



Jumat, 09 Agustus 2024

Ogen: Markus 7:1-13



Nergaken Adat



Lain lubuk lain ikannya, lain tempat lain kebiasaannya. Bagenda me sada belas-belas sinuriken maka kerina ingan i doni enda, erbage-bage kebiasanna si isepakati masyarakatna jadi orat geluhna. Emaka ia kerina ngergai adat si lit i tengah-tengah sukuna e. Dikune lit si ngelangarsa minter nge la akapna payo sabap e kehagan ras erga dirina. Lit sada pengalamen sekalak si atena meneliti adat budaya sada suku, maka ia arus ngikuti cara geluh masyarakat e. Umpamana, suku Dayak ipedalamen Kalimantan bagepe suku i Papua. Masyarakat internasional ngergai adat budaya tep-tep suku e me si iperingeti tep-tep tanggal 09 Agustus, i ja tep-tep masyarakat adat lit hakna ngaturken kegeluhen masyarakatna rikutken undang-undangna jine aminna pe la tertulis.

Si inget masyarakat Karo, kerna taneh kuta, si manteki kuta rikut ras pembagin waris, megati iendesken pemerintah denga ku tua-tua kuta. Bageme kebayaken suku-suku i doni enda.

Arah renungenta wari enda, masyarakat Jahudi pe lit aturen kebiasaan praktis si arus ilakoken tep-tep wari e me erburih sope man nta h mbersihkan diri sope man adi i ja nari pe. Adat kebiasaan enda ilakokenna denga tapi si idahna la ilakoken ajar-ajar Jesus kebiasaan si bage rupa. Emaka minter ipandangna si ilakoken ajar-ajar Jesus e. Jabap Jesus labo persoalen adat e tapi lebih mbages maka la terjeng ndalanken aturen luar lebih min kerna kebersihen pusuh ras kekelengen lebih penting.

Jesus mentingken pusuh ras ukur i bas keleng ate asangkan aturen lahiriah si njadikan kalak pekulah-kulah saja. Bagi nai, kalak Karo pe madin akapna ikataken la erkinitiken asangkan la radat. Apai pe penting kal bas geluhna adi tuhu-tuhu si ilakoken e mabai kiniulin labo terjeng tatapen ras penilen kalak si penting. Ergailah adat budayanya alu mehuli alu tutus erkinitiken man Dibata.